

**Timersortartut nuna tamakkerlugu unammisartut peqataanerisa taakku sulliviinnut imaluunniit ilinniarnernannut sapinngisamik ajoqutaasinnaasumik kinguneqaqqunagu qanoq iliorluni timersortartut nuna tamakkerlugu unammisartut atugaat pitsanngorsarneqarsinnaanersut misissoqqullugu Naalakkersuisut peqquneqarnissaannik Inatsisartut aalajangiiffigisassaattut siunnersuut. Kalaallit Nunaanni Timersortartut Kattuffiat, immikkut kattuffiit kiisalu allat susasaqartut soqutigisaqaqatigiit misissuinermut UKA2018 tikitsinnagu Inatsisartunut agguanneqartussamut peqataatinneqassapput**

(Inatsisartunut ilaasortamit Nivi Olsenimit, Demokraatit saqqummiunneqartoq)

**pillugu**

**Kultureqarnermut, Ilinniartitaanermut Ilisimatusarnermut Ilageeqarnermullu  
Ataatsimiititaliap**

**Siunnersuutip aappassaanneerpeqarnerani**

**ISUMALIUTISSIISSUTAA**

Kultureqarnermut, Ilinniartitaanermut, Ilisimatusarnermut Ilageeqarnermullu  
Ataatsimiititaliap suliarinninnermini ilaasortarai:

Inatsisartunut ilaasortaq Vivian Motzfeldt, Siumut, siulittaasuugallartoq  
Inatsisartunut ilaasortaq Peter Olsen, Inuit Ataqaqatigiit, siulittaasup tullerigallagaa  
Inatsisartunut ilaasortaq Laura Táunâjik, Siumut  
Inatsisartunut ilaasortaq Anthon Frederiksen, Partii Naleraq  
Inatsisartunut ilaasortaq Debora Kleist, Inuit Ataqaqatigiit (sinniisoq)

Ulloq 10. oktober 2017 UKA2017-imi siullermeerinninnerup kingorna ataatsimiititaliap  
siunnersuut misissorpaa.

### **1. Siunnersuutip imarisaa siunertaalu**

Siunnersuutip nassataraa, timersortartut nunarput sinnerlugu peqataanerminni suliffeqarnikkut aamma ilinniagaqarnikku atukkatigut sunnerneqartarnerisa sapinngisamik minnerpaaffissaminiitinneqarnissaata qulakkeerneqarnissaa misissoqqullugu Naalakkersuisut peqquneqarnissaat.

Misissuinermik suliaqarnermi kissaatigineqartumi Naalakkersuisut sapinngisamik Kalallit Nunaanni Timersoqaqatigiit Kattuffiat, immikkut kattuffiit, kiisalu soqutigisaqaqatigiit allat ilanngutsissavaat. UKA2018 nallertinnagu misissuinermi inernerit Inatsisartunut agguanneqarnissaat kissaatigineqarpoq.

## 2. Ilisimatitseqatigiiffiusumik ataatsimiinneq

Ataatsimiititaliap siunnersuummik suliaqarnerminut atatillugu Kalaallit Nunaanni Timersoqatigiit Kattuffiat/Elite Sport Greenland ulloq 1. november 2017 ilisimatitseqatigiiffiusumik ataatsimeeqatigaa.

Ataatsimiinnermi GIF/ESG-ip siunnersuummut matumunnga isumaliusersuutini aamma konto pingaarneq 40.94.13.-ip atorneqarnera pillugu saqqummiussivoq. Ilisimatitsissutit taakku ataatsimiititaliamit siunnersuummik matuminnga suliaqarnermi ilanngunneqarput.

## 3. Apeqqutit

Siunnersuummik suliaqarnermut atatillugu ataatsimiititaliamit Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisumut apeqqutitut arlalinnut akissuteqarnissaanik qinnuigaa. Ataatsimiititaliap apeqqutai Naalakkersuisullu akissutai isumaliutissiissummut uunga **ilanngussaq 1 aamma 2-tut** kakkiunneqarput. Ataatsimiititaliap siunnersuummik suliaqarneranut Naalakkersuisunit akissuteqaat atorneqarpoq.

## 4. Siunnersuutip ataatsimiititaliamit suliarineqarnera

Nuna tamakkerlugu unammisartut nunarput sinnerlugu peqataasarnerminni nunatsinnut sinniisuunerannik siunnersuuteqartup isumaqarnera ataatsimiititaliamit taperserneqarpoq. Taamatuttaarlu nunatta iluani nunarput sinnerlugu timersortartut peqqissuseq, malueraugassiuineq, anguniagaqartarnerlu eqqarsaatigalugit inuttaasunut maligassiuisuupput. Naak nunarput inuttakitsunnguugaluartoq najugaqariaaserpullu allaagaluartoq nuna tamakkerlugu timersortartuvut amerlasuut naak inuuniutigineqarsinnaanera killeqaraluaqisoq taamatut maligassiuisuupput. Taamatuttaaq nunarput sinnerlugu timersortartuvut amerlanertigut timersornermik saniatigut tamakkiisumik suliffeqarput ilinniartuullutilluunniit. Pissutsit taamaattut nunami mikisunnguami allanngortikkuminaatsuupput. Piginnaanilittatta timersornermi aaqqissuussanut assigiinngitsunut peqataasinnaanerannut tapersiiniarluta Naalakkersuinikkut sinaakkutsissanik pitsaanerpaanik pilersitsiniarsarisinnaasariaqarpugut, taamaalillutik timersortartortatta pitsaasumik maligassiuisuusut pisussaaffimminnik allanik suliffimminnik il.il. pitaanngitsumik sunniuteqarfigineqarsinnaanerit sapinngisamik minnerpaaffissaminiitillugu.

Siunnersuummi matumani nunatsinni timersortartut timersornermut atatillugu nunani allani unammillutik peqataanermikkut sulinnigiffeqarnerminni aningaasatigut annaasaqaataasa sapinngisamik annikillisinneqarnissaat siunertaralugu tapiiffigineqartarnerit pitsanngorsarneqarnissaat siunnersuuteqartup siunnersuuteqarnermini kissaatigigaa ataatsimiititaliamit paasineqarpoq. Siunnersuut tamatuma saniatigut aamma timersortartunut ilinniakkamik ingerlatsisunut tungassuteqarpoq. Ataatsimiititaliarli isumaqarpoq siunnersuutip siullermeerlugu suliarineqarnerani Naalakkersuisut akissuteqarnerminni

uppernarsaraat inuusuttut ilinniagaqartut nunarput sinnerlugu timersornernut toqqarneqaraangata annertuumik isiginiarneqartareertut.

Siunnersuutip siullermeerneqarnerani Naalakkersuisut erseqqissaatigaat aningaasanut inatsimmi konto pingarneq 40.94.13-mi 250.000 kr.-nik aningaasaliisoqarsimanera ukununnga siunertalinnik:

*Aningaasaliissutinit 250.000 koruunit Kalaallit Nunaata De Olympiske Legenut, Nunarsuarmi Pissartanngorniunnernut, Europami Pissartanngorniunnernut, Amerikap Nunavittaani Pissartanngorniunnernut imaluunniit World Cupinut peqataatitaqarnissamut atatillugu sulinngiffeqarnermi annaasassanut tapiiffigineqarnissamik qinnuteqaatit naammassisinnaajumallugit immikkoortinneqarput.*

Taamatutaaq Naalakkersuisut ilisimatitsissutigaat:

*”Ukiuni kingullerni pingasuni Kalaallit Nunaanni Timersoqatigiit Kattuffiata ukiumut agguaqatigiissillugu 117.000 kr.-it aningaasarsianut annaasanut matussutissatut tapiissutigisarpai.”*

Aningaasaliissutitut taakkununnga qinnuteqariaaseq ataatsimiititaliap siunnersuummik suliaqarnerminut atatillugu misissorsimavaa. Tamatumunnga Naalakkersuisut ima paasissutissiipput:

*”Qinnuteqarnermi, qinnuteqartoq ilanngussassanik assigiinngitsunik ilanngussisussaavoq: suliffeqarnermut silisitsisumiit uppernarsaat, akileraartarnermut allagartaq, angalasimanermit uppernarsaat tassungalu ilanngullugu angalernermit billetsu najuussimanermullu uppernarsaat kontorisallu normua. Akuersisummut allagartaq kiisalu akissarsiffimmi tullermi sulinngiffeqarsimanermit annaasaqaatinut taartaasut ikineqarneranut uppernarsaat Elite Sport Greenland-ip suliarissavai.”*

Siunnersuummut matumunnga atatillugu piffissaliunneqartup iluani piffissami 2010-miit 2016-mut qinnuteqartut qassiusimanerinit paasissutissat Elite Sport Greenland (ESG-ip) piffissaliunneqartup iluani tunniussinnaasimanngikkai Naalakkersuisut akissuteqaataat tunngavigalugu ataatsimiititaliamit paasineqarpoq. Tamanna aamma piffissami 2010-miit 2012-mut qinnuteqartut akuerneqarsimasut amerlassusaannut atuuppoq. Piffissaliunneqartup sivikippallaarnera tunngavigalugu paasissutissanik pissarsiniarsinnaanerup ajornakusoorsinnaanera ataatsimiititaliamit paasineqarpoq. Piffissamili pineqartumi aningaasaliissutitut qinnuteqartarnerit kiisalu qanoq annertutigisumik akuersissuteqartoqartarnera pillugu paasissutissat illuatungeriit annertunerusumik nakkutigissagaat ataatsimiititaliamit kaammattuutigineqarpoq. Konto pingarneq 40.94.13-mut aningaasaliissutit atunngitsoorneqartarnerinit ilumut qinnuteqanngitsoortoqartarnera tunngaviusinnaasimansoq pillugu taakku paasissutissiisnaapput. Ilanngullugulu nunatsinni

timersoqatigiit kattuffiata sulinermit annaasaqarnermi qinnuteqarsinnaanermut periarfissaq specilaforbundit ilisimasaqarnissaat qulakkeerniarlugu Naalakkersuisut ESG-mik oqaloqateqarnernik aallartitseqqullugit Naalakkersuisut ataatsimiititaliamit kaammattorneqarput.

Unamminernut Konto pingaarneq 40.94.13-kkut sulinermi isertitassatigut annaasaqaatinut matussusiivigineqarsinnaasut nalunaarsorneqartunut Island Games ilanngunneqarsimannginnera ataatsimiititaliap paasivaa. OL/VM/EM/PAN AM/World Cups aamma Island Games assigiinngissutaat tassaagunarpoq kingulleq taaneqartoq unamminerummat nunami pitsaanersiuukkanit peqataaffigineqarani kisiannili qeqertami pitsaanerpaasunit peqataaffigineqartartoq. Tamannali nunatsinnut atuussorinanngilaq.

Naggasiullugu Naalakkersuisut ataatsimiititaliamut ima ilisimatitsipput:

*”Elite Sport Greenland-ip Naalakkersuisut ilisimatippai konto pingaarnermi 40.94.13 Timersornermut tapiissutit, oqaaseqatigiivi allanngortinneqarpata, aaqqissuussinerit allat, ilaatigut sungiusarluni unamminerit, nunanut allanut unamminerillu allat ilanngunneqartuuppata aaqqissuussa q aningaasanik tamakkiinerusumik atuinissaminut periarfissaqalissagaluartoq. Ilisimatitsissutigineqarportaaq GIF/ESG-lu aaqqissuulluakkamik qinnuteqartartut akuerineqartartullu amerlassusaannik katersugaateqanngitsut, suleriuserli siumut allanngortinneqassasoq.”*

Isumaliusersuutit taakku aamma GIF/ESG-mik ataatsimiititaliap ataatsimeeqateqarneranik saqqummiunneqarput. Konto pingaarneq 40.93.14-mi taaneqartut 250.000 kr.-it qinnuteqarfigineqartarnissaat pillugu piumasaqaatinik oqaasertalersuinerup allanngortinneqarnissaa pillugu Naalakkersuisut GIF/ESG-mik oqaloqateqarnissaat ataatsimiititaliamit pitsaasutut isigineqarpoq. Aningaasanut inatsisini konto pingaarneq 40.94.13-mi oqaasertalersuineq taaneqartutut allanngortinneqarpat siunnersuummi matumani siunnersuuteqartup siunertarisaa anguneqarsinnaasoq ataatsimiititaliamit ilimagineqarpoq. Taamaallillugu taaneqartutut aningaasanut inatsimmi oqaasertaliunneqarsimasut allanngortinneqarnissaanut periarfissaq Naalakkersuisunit misissorneqassasoq ataatsimiititaliamit kaammattuutigineqarluni. Ataatsimiititaliali aallaavittut naatsorsuutigaa annertusisitsineq atugassiissutaasut 250.000 kr.-nit iluanni pissasoq. Tamanna pisinnaanngippat, aningaasanut inatsimmik suliaqarnerup sinneranut atatillugu Naalakkersuisut iliuuseqarnissaat pisinnaasoq ataatsimiititaliamit qilanaarineqarpoq.

## **5. Siunnersuutip aningaasatigut kingunerisassai**

Inatsisartut suleriaasaanni § 33 imm. 1-imi takuneqarsinnaavoq, aalajangiussassatut siunnersuutip allaffissornermi aningaasatigullu kingunerisassai siunnersuutip tunngavilersuutaani nassuiaatigineqassasoq.

Siunnersuutip piviusunngortinneqarnerani aningaasatigut kingunissaritinneqartut siunnersuummut naapertuuttut ataatsimiititaliamit maluginiarneqarpoq. Tamatumunnga allatigut oqaaseqarnissamut ataatsimiititaliamit pissutissaqartinneqanngilaq.

#### **6. Ataatsimiititaliap inassuteqaatai**

Siuliani allassimasut kiisalu timersorneq timigissarnerlu pillugit Inatsisartut inatsisaanni nr. 15, 6. juni 2016-imeersumi § 11, imm. 2 aallaavigalugit ataatsimiititaliaq Naalakkersuisunut ima kaammattuuteqarpoq:

- Aningaasanut inatsimmi konto pingaarnermi 40.94.13-imi missingersuutitut ilanngussami sulinngiffeqarnermi annaasanut immikkut atugassanngorlugit tapiissutissatut immikkoortitanit pissarsisinnaasut ilaneqarnissaat sulissutigineqassasoq. Qanoq annertutigisumik ilaneqarnissaat GIF/ESG oqaloqatigalugit aalajangersarneqassaaq.

Taamatut kaammattuuteqarneq tunngavigalugu ataatsimiititaliaq ima inassuteqarpoq:

Ataatsimiititaliap **isumaqatigiittup** siunnersuutip **itigartinneqarnissaa** inassutigaa.

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappassaaniigassanngortippaa.

Vivian Motzfeldt

Vivian Motzfeldt  
Siulittaasuugallartog

Peter Olsen

Peter Olsen  
Siulittaasup tullerigallagaa

Laura Táunâjik

Laura Táunâjik

Anthón Frederiksen

Anthón Frederiksen

Debora Kleist

Debora Kleist



Ilinniartitaanermut, Kultureqarnermut,  
Ilisimatusarnermut Ilageeqarnermullu  
Naalakkersuisoq  
[IKIIN@nanog.gl](mailto:IKIIN@nanog.gl)

Ulloq: 25-10-2017  
J.nr.: 01.39.01.03-00196

### UKA2017/58-mut allakkatigut apeqqutit

UKA2017/58-ip suliarineqarneranut atatillugu Kultureqarnermut Ilinniartitaanermut, Ilisimatusarnermut Ilageeqarnermullu ataatsimiititaliamit Naalakkersuisumut apeqqutit uku akissuteqarfigineqarnissaat qinnutigineqarpoq.:

Aningaasanut Inatsisini konto pingaarneq 40.94.13-mi tapiissutini nunat kalaallit nunaat sinnerlugu tamalaat unamminerannut il.il. 250.000 kr. Immikkoortinneqarsimapput. Tamatumunnga atatillugu Naalakkersuisut qinnuigineqarput uku ilisimatitsissutigeqqullugit:

1. Qinnuteqarnermi periuseq
2. Ukiuni 2010-miit 2016-mut ukiumut qinnuteqartut amerlassusaat.
3. Ukiuni 2010-miit 2016-mut ukiumut qinnuteqartut qassit akuerineqarsimaneri kiisalu aningaasaliissutigineqartut amerlassusaat.
4. Aningaasat qulaani pineqartut Arctic Winter Games-imi aamma Island Games-imi peqataanermi qinnutigineqarsinnaanginnerat eqqortuuva?
5. UKA2017/58-imut tunngatillugu allatigut Naalakkersuisut ilisimatitsissutissaqarpat?

Akissuteqaatip tiguneqarnissaat ataatsimiititaliamit qilanaarineqarpoq, taannalu qarasaasiakkut kalaallisut aamma danskisut [ina@ina.gl](mailto:ina@ina.gl)-mut assilinera ataatsimiititaliami allatsimut [rfr@ina.gl](mailto:rfr@ina.gl)-mut nassiuuneqarnissaa kissaatigineqarpoq. Siunnersuutip appasaanneerineqarnissaanut ulluliussaq eqqarsaatigalugu apeqqutit uku kingusinnerpaamik 31. oktober 2017 akissuteqarfigineqarnissaat qinnutigineqarpoq. Ulluliunneqartoq nallertinnagu naammaginantumik akissuteqarnisaq Naalakkersuisunut ilimagineqangippat, tamatuma nalunaarutigineqarnissaa kissaatigineqarpoq.

Kultureqarnermut, Ilinniartitaanermut, Ilisimatusarnermut Ilageeqarnermullu  
Ataatsimiititaliaq sinnerlugu

  
Vivian Motzfeldt  
Ataatsimiititaliami siulittaasup tullia



Kultureqarnermut, Ilinniartitaanermut Iisimatusarnermut  
Ilageeqarnermullu Ataatsimiititaliaq  
Uunga ataatsimiititaliamut allatsi Rikke Frederiksen  
rfr@inatsisartut.gl

Ilanngussaq 02

**Naalakkersuisut "UKA2017/58-imut allakkatigut apeqqutit"-nut akkissuteqaataat**  
Ilinniartitaanermut, Kultureqarnermut, Iisimatusarnermut Ilageeqarnermullu  
Ataatsimiititaliaq ulloq 25. oktober 2017 Naalakkersuisut qinnuigai UKA 2017/58-imut  
apeqqutit akeqqullugit.

03-11-2017  
Sagsnr. 2017 - 20789  
Dok. nr. 6519279

Postboks 1029  
3900 Nuuk  
Tlf: +299 34 50 00  
Fax: +299 32 20 73  
Email: ikiin@nanoq.gl  
www.nanoq.gl

Kalaallit Nunaanni Timersoqatigiit Kattuffiannut paasissutissanik  
aallertoqartariaqarsimavoq, Ilinniartitaanermut, Kultureqarnermut, Iisimatusarnermut  
Ilageeqarnermullu Naalakkersuisoqarfiup paasissutissat piginnimmagitt. Saaffiginnissut  
Elite Sport Greenland-imut ingerlateqqinneqarpoq tassani qinnuteqaatit  
isumagineqartarmata, kinguneratigullu paasissutissat Naalakkersuisunut  
nassiunneqarput.

Naalakkersuisut paasissutissat tigusimasat tunngavigalugit Naalakkersuisut matumuuna  
apeqqutit akissavaat.

**1. Qinnuteqarnermi periuseq**

Qinnuteqarnermi, qinnuteqartoq ilanngussassanik assigiinngitsunik  
ilanngussisussaavoq: suliffeqarnermut sulisitsisumiit uppersaat,  
akilerartarnemut allagartaq, angalasimanermut uppersaat tassungalu  
ilanngullugu angalanermut billetsu najuussimanermullu uppersaat konto-  
risallu normua.

**2. Ukiuni 2010-miit 2016-mut ukiumut qinnuteqartut amerlassusaat.**

Piffissamat pineqartumi qinnuteqartut amerlassusaat pillugit paasissutissanik  
Elite Sport Greenland (ESG) nassaarsinnaasimangilaq. Misissueqqissallutilli.

**3. Ukiuni 2010-miit 2016-mut ukiumut qinnuteqartut qassit**

**akuerineqarsimaneri kiisalu aningaasaliissutigineqartut amerlassusaat.**

Ukiunut 2010-2012 aningaasaliissutit annertussuserisimasaannik  
imaaliallaannaq pissarsiaqarsinnaasimangillat. GIF-ili sukumiinerusumik  
misissuiniarpoq.

- a. 2013: 101.000,00 kr. qinnuteqartunut 10-nut agguaallugit.
- b. 2014: 101.400,00 kr. qinnuteqartunut 10-nut agguaallugit.
- c. 2015: 118.800,00 kr. qinnuteqartunut 12-inut agguaallugit.
- d. 2016: 130.650,00 kr. qinnuteqartunut 13-inut agguaallugit.


**4. Aningaasat qulaani pineqartut Arctic Winter Games-imi aamma Island  
Games-imi peqataanermi qinnutigineqarsinnaannginnerat eqqortuuva?  
Aap, eqqortuuvoq.**



5. UKA2017/58-imut tunngatillugu allatigut Naalackersuisut ilisimatitsissutissaqarpap?

Elite Sport Greenland-ip Naalackersuisut ilisimatippai konto pingaarnermi 40.94.13 *Timersornermut tapiissutiit*, oqaaseqatigiivi allangortinneqarpata, aaqqissuussinerit allat, ilaatigut sungiusarluni unamminerit, nunanut allanut unamminerillu allat ilanngunneqartuuppata aaqqissuussaqa aningaasanik tamakkiinerusumik atuinissaminut periarfissaqalissagaluartoq. Ilisimatitsissutigineqarportaaq GIF/ESG-lu aaqqissuulluakkamik qinnuteqartartut akuerineqartartullu amerlassusaannik katersugaateqanngitsut, suleriuserli siumut allangortinneqassasoq.

Inussiarnersumik inuulluaqqusilluta  
Med venlig hilsen



Doris J. Jensen